

Téeríi ana fa bíníyú unni kayya won Pool bëy Tesalonik ra Kúnsëe

Pool daa bíní bëy ílí janjii Tesalonik unni yeh. Filiḅ unna, dī dēbpi géréḅ Yíkēe di gémē gémú bëy Tesalonik ra (1.3), dī dāgidte wa, wa ham légéyē nahu wa ra. Fu ot Pool bíní wē unni yeh, nísí níbbē na yah janjii Tesalonik ra. Woni ban fi nimili Kiristaa daa ḅaatti kúḅ wona filiḅ Tesalonik, ndah lahte ḅēewí wonuu biti nagajek bisi baa lahte níi gétté. Lahte yi wonu tih bisi baa lahay doom ndaa leḅohte. Yaa aa na waa na kaa'uute légéy, ñamuu ya' yi ḅēewí kayya.

Di wonte wa :

- yii lenke ayi Yíkēe yiin bis-kēem (1.3-10),
- yii lenke yee nay kēllée Yéesú rē (2.1-12),
- yii lenke hīnndēh, ñee waali Koope (2.13-17),
- a yii lenke ḅee laha' légéy solo ow na ra (3.6-15).

ḅēyí fi janjii téeríi bee ḅéēḅ ay ot biti légéy daa wun ow na, ḅēe' ḅanti sehaa íñi ḅéēḅ ya' ow, dī sehaalee nimili Yíkēe.

Wodohi Pool bëy Tesalonik

¹ Don fi bëy ílí janjii Tesalonik fa nonu ḅēewí Baap-Koo a Yéesú-Kiristaa Yíkēe rē, so' mi Pool, funi Silaas a Timoote fun na woduu ron.

² Baap-Koo a Yéesú-Kiristaa Yíkēe líhún ron mal, on ḅon jaamma !

Ayi Yíkëe yiin bis-këem

³ Koy-yaayyi yeh, fun mínih banti dékë' símí Koope ndah don. Fun warutee ri sím ndah ngémën baatohte caak, te fahanta'a hom handal kon da baatoh baatoo na saañ.

⁴ Yii baa daa tah ílí janjii pay fun bééβ, fun sawoor won bëewë filib yii lenke don na, ndah filib mokla na moklu don da a súfúñ fën bééβ, don habute ngémën híin.

⁵ Baa daa nay teebee biti aattiya'i Koope tíkë' waal, nda don habuu bëewí Nguur ki Koope wadte wa, nguur ka tah don na súfúñú rë.

⁶ Koope, di fa júβ dë ay mokil bëewë moklu don da ti di mokluu wa don nen, te nagajek baa daa kaah.

⁷ Di ay hílsídf don fa na súfúñú rë, hílsídf fun na bal. Yiin nay feeñiyee Yéesú-Yíkëe sun-Koo, ñéerë' a doolii malaaka yi ra, iñyaa ay lahee na.

⁸ Di ay ayee filib njaar kii, keen sun fi bëewë kaa'uu yúhí Koope, te kaa'uute ñeyi Uni Nebi Yéesú-Yíkëe rë.

⁹ Daana nay keene sun fi wa ra ay dékée sanjkii wa, wa wulliru tígí eta' Yíkëe, wulliru tígí eta' ndami gaani.

¹⁰ Yii baa ay lahe yiin nay nimile Yíkëe rë. Yiin fi baaha, bëewë nonu dii na te gémúté dii na ra bééβ béyídf di, di neba' wa yeel. Don fi yaa don ay none bëewí yaaha na, ndah don gémúté unna komu fun don da.

¹¹ Yii baa daa tah fun na dagiru ron faraa. Fun daguu Koope biti di on don, don yeeliyoh pesa dëek di don da. Fun dagu biti di doolii, di habra' ron don pañ yee fahuu don pañ di yin

wun da béeb, te ri habra' ron yee na pagu don filiɓ ngémèn dë.

¹² Daaha, don baatti béyíɗ tii Yéésú Yíkíi yen, dī béyíɗ don fi yaa bal. Yaa ay kolee mala nay onee Koope fi yen a Yéésú-Kiristaa Yíkëe rë.

2

Yee nay këllée Yéésú rë

¹ Koy-yaayyi yeh, di yii lenke nimili Yéésú-Kiristaa Yíkíi yen a négírë'í yen fiyí, fun dagu don na yin yinë :

² affon banay gaawti kúnëh te ngënë tíití biti ow won don biti wahtii nimili Yíkëe lahte. Wuti ow won don biti dī léhín unni kola' Koope na, mbée don keloh ri bëewë na waariyu Unni Koope ra, mbée bíníyún bíníyë wonu biti kola' fun na, ngënë gémí.

³ Di mín dīi man béeb, ow banay don nofa' yinë sah. Balaa bisa nay nimile Yíkëe baa ra, ow caak ay tíkë' Koope af paay, bëe' na ñeyeh woni Koope ra, bee nay saŋkuye ra teekiroh.

⁴ Bëyí baa ay béyíɗ afi kadda' bëewë haanoh ala a yii na haanuu wa merees béeb. Ay pay níi dī haal Faam fi gaani Koope took, dī won biti daa ri Koope.

⁵ Don nérsúuy biti mi húmú wonte ron baaha homa' mi leeloon ra a ?

⁶ Don yúhú yee ham bëyí baa tígë homa' ri bee ra, te yii baa tahte wahtii ay lahe laho dī anti d'úh.

⁷ Doolaa d'apoh bëewë në ñéyíh woni Koope ra ee teekiroh ra haat ; dī ay lukee teekiroh biti nék bëe' lís dīi ham da këllú tígí daaha.

⁸ Bëyí baa këllú tígè rëe, dī fi bëe' na ñeyeh woni Koope ra ay teekiroh, te Yéesú-Yíkëe ay rii san̄ku a ngilaaw mi búkí, hap ri húl a niiña nay rii ñéerée bití dī nimil ra.

⁹ Di fi bëyí baaha, doolii Seytaane nay rii yeje dī ac, dī paŋ kawtéef gaan, kimtaan a iñi éemílè'té béeb, yi ay nofee bëewë.

¹⁰ Di ay paŋ pagad bos béeb nofa'i bëewë në suu san̄kuye ra. Wa ay san̄ku ndah wa tahuy kúnsí keeññi wa kaaf ka wad' waa sëmlè' koon dā.

¹¹ Yii baa daa tah Koope yeñ wa yii ay waa múuyíd, wa gémé fel.

¹² Daaha, bëewë gémúy kaaf ka ra béeb, te oluu neb pagad bos dā, Koope ay keen sun fi wa.

Híinndeh, ñee waali Koope

¹³ Koy-yaayyi yeh, fun nék fun mínih banti déké' simí Koope ndah don, don fa Yíkëe faha' don dā ndah Koope daa tanis don dalaana, nda don múc. Di ñeya' Ruuha ladil don ra, a gémë gémú don kaaf ka ra, dī múcèlté ron.

¹⁴ Koope ñeya' Uni Neba waariyu fun don dā dëekké don yii baaha nda don mit na ndami Yéesú-Kiristaa Yíkii yen.

¹⁵ Koy-yaayyi yeh, kon híinndí te don ham iña yëeddú fun don dā : yee wonu fun mbée yee bíníyú fun dā béeb.

¹⁶ Koo Boffi yen faha'te yen, onte yen mal níi yen lahute míní múñi na dúméh a yaakaari nebpe. Démíin dī fi Yéesú-Kiristaa Yíkii yen a Koo Boffi yen

¹⁷ on don doole, on don keeñi paguun don yin wun faraaḥ : yaha yii ay pagu pago mbée yii ay wonu wono béeb.

3

Naha'i Pool d'agid'

¹ Leegi nék koy-yaayyi yeh, d'égíri fun nda unni Yíkée yíppí líiwělsě' gina te wa lah ndam ti di man wa don na nen.

² D'égíri fun Koope nda ri sěmlě' fun bēewě bosu níi bos ra na, ndah bēewě béeb neh daa gémú ina na wonu fun ra.

³ Te añcaḥ Yíkée daa mit gém. Di ay ron on doole, níid d'ēn níi Seytaane ii ron leboh.

⁴ Yíkée onte fun níi fun lekuute ron : fun olute biti don ee pagu ina wonu fun don da, te don ay lúsdée daaha.

⁵ Yíkée ona ron keeñi fahuun don Koope, on don don múñ ti dī fi Kiristaa nen.

Dee laha' légéy solo ow na ra

⁶ Koy-yaayyi yeh, lahte bēewí d'apasute filib fi yen, na ñeyíh ina yēeddú fun wa ra. Fun na nahu ron di tii Yéesú-Kiristaa Yíkée, don wuloh wa.

⁷ Don yúhruté affon dee wadti ñeyuun kotti fun da. Homuu fun ginon da fun mēsúy tídēh.

⁸ Fun yeekuy ow ñam. Fun húmú légéyúu yii ñamun fun légéyēe na' a elek, kaa' fun mokil ow yíně sah don na.

⁹ Fun paguuy ri biti don waruy fun pagid' yin pagiro, ndaa fun fahuu biti don ñee kotti yaaha,

¹⁰ ndah húmú homuu fun gin don da, fun wonute ron biti bēyí kaa' légéy waray ñam.

¹¹ Fun nék, fun keltuute biti lahte bëewí awu ñon na pesuu tídëh, në pëgíh yin gét nëe haal yii waal fi wa íníh në.

¹² Di tii Yéésú-Kiristaa Yíkëe, fun túuyú bëewí yaa fun na caguu wa bitih, wa koloh affi wa yuloh légéy nda wa kúdf affi wa.

¹³ Don fi koy-yaayyi so' nék, lah hëbí híin ñon déké' paŋ yin wun.

¹⁴ Hena biti lahte bëyí kaa' ñee unna bíníyú fun yee ra raa, lah wëní rí sun, ñon ñan ñii leboh nda ri sopoh ndín, koloh afi.

¹⁵ Di filib yaa béeb nék, ngënë hëbíi rí kaa'ohon, lah hëbíi rí koy-yaafon, ñon líkín dí.

Daja téy unna ra

¹⁶ Démiin Yíkëe fë në ona' jaamma ra on ñon jaamma faraah, a yii mín ñon homa'. Yíkëe ñéerëe a ñon béeb.

¹⁷ So' mi Pool daa mi bíní unna míllë' yee ra*. Mi yahti téy unni so' raa, mi hena' ñeh : so' mi Pool daa mi na bíní a ya' so'. Hen ñaa raa, bëewë ay yúhsë' bíníyí së'.

¹⁸ Yéésú-Kiristaa Yíkíi yen líhë rën béeb mal !

* **3:17 3:17** Bín fë, ow daa na húmú bíníyídf Pool. Unna yahti téyú rëe, Pool a faanaŋ fi daa na bíní a ya'i nda bëewë yúhsë' unna bíní rí rë béeb.

Séréel Ndút: Unni Koope

Ndut: Séréel Ndút: Unni Koope (New Testament+)

copyright © 2020 Wycliffe Bible Translators, Inc.

Language: (Ndut)

Contributor: Wycliffe Bible Translators, Inc.

All rights reserved.

2020-11-20

PDF generated using Haiola and XeLaTeX on 28 Dec 2024 from source files dated 29 Jan 2022

a3a1238b-9393-5875-a4c5-1d3f38537bfe